


# Merita vinavant renconuschientscha e sustegn

DA GIUSEP NAY.,  
ANT. PARSURA DAL TRIBUNAL FEDERAL

Igl èn 75 onns dapi ch'il rumantsch è vegnì renconuschì en l'art. 116 da la Constituziun federala da lezzas uras sco lingua naziunala, sper il tudestg, il franzos ed il talian. Giudair renconuschientscha, esser renconuschì è bel ed impurtant. Pli impurtanta che l'instituziun u la persuna che exprima la renconuschientscha è, pli gronda ed impurtanta che la renconuschientscha è. Il cussegl federal ha gì proponì la renconuschientscha dal rumantsch sco lingua naziunala a l'assemblea federala cun in messadi, anc scrit personalmain ed a maun dal grond cusseglier federal Philipp Etter. Quella ha recumandà quai senza esitar ed il pievel ed ils chantuns svizzers han lura acceptà cun gronda maiortad questa amplificaziun da nossa Constituziun federala.

La renconuschientscha costituziunala da tut las quatter linguas sco linguas naziunals – damai er il rumantsch sco lingua d'ina minoritad – è singulara en cumparegliaziun cun auters pajais, nua che vegnan era discurrendas pliras linguas per part medemmain minoritaras, ed ha per quel motiv sia impurtanza zunt preziosa. Ella è bler dapli ch'ina simpla declamaziun.

En il medem senn sco la crusch valva sin il fund cotschen da la bandiera svizra vegn la quadrilingui-



tad resguardada ed è da resguardar sco grond simbol d'identitad e d'unitad da sias quatter linguas e culturas. La Svizra furma in'unitad ed ina naziun cun e malgrà questa diversitad. La renconuschientscha era dal rumantsch tenor il dretg costituziunal signifitga dentant il medem mument era program e qua tras era l'obligaziun da porscher sustegn giuridic e finanziel.

Tge ch'il grond sustegn finanziel da la confederaziun per la Rumantschia ha signifitgà e signifitgescha vinavant na sto betg vegnir explitgà pli lunsch. Che quella è obligada giuridicmain da far quai, n'essend la renconuschientscha betg mo ina simpla declamaziun, po e sto vegnir fatg valair pli decididamain ch'il davos temp cun pretender senza retegni-

tschas falladas in'augmentaziun considerabla da la contribuziun da la Confederaziun pli che necessaria e giustifitgada.

Il sustegn giuridic è succedi cun la libertad da lingua, gia declerada sco dretg fundamental dal tribunal federal, e cun il princip territorial inscrit il 1996 en nossa Constituziun federala cunzunt per proteger il rumantsch. Il medem onn è nossa lingua materna diventada lingua uffiziala parziala da la confederaziun, quai che garantescha ad ella ina preschientscha essenzialmain pli gronda en ina pli vasta publicitad – oz indispensabla – e dat ad ella in pli grond prestige.

Per obtegnair l'onn 1938 la renconuschientscha costituziunala hai duvrà en emprima lingua in'unitad entaifer la Rumantschia. Personalitads rumantschas cun in vast orizont han fullà quella via cultivond betg mo l'ageniert e curtin. Per segirar vinavant il sustegn da la confederaziun è questa unitad vinavant indispensabla, betg il davos era l'unitad pragmatica cun il rumantsch grischun, la quala era persunas rumantschas da gronda responsabladad e curaschi han chapì da crear e d'affirmar cun success. Senza quella lingua comunabla ch'è d'acceptar e che po vegnir acceptada da tut las Rumantschas e da tut ils Rumantschs almain passivmain sper ils idioms, na fissan stadas pussaivlas ni la stipulaziun dal rumantsch sco lingua uffiziala par-

ziala sin plaun federal ni la realisaziun da las pli vastas publicaziuns uffizialas dal chantun en rumantsch. Questa lingua unitara è in grond agid per tuttas e tuts che han la buna veglia, pertge che las Rumantschas ed ils Rumantschs n'èn betg il davos quels che pon siglir elegantamain tranter differentas linguas e variantas da linguas. Nossa ritgezza linguistica è vegnida augmentada.

Premessa per tut quels fatgs positivs ed impurtants e per meritavon vinavant la renconuschientscha obtegnida è e resta oz vinavant l'unitad rumantscha. Tut quai che disturba quella, sco promover las difficultads d'acceptar plaun a plaun il rumantsch grischun empè da gidar a surmuntar quellas, pericletescha la gronda simpatia en Svizra ed il grond sustegn da la confederaziun ed era quel dal chantun. Il chantun sa zuppa pli che gugent davos la mancanza d'unitad da las Rumantschas e dals Rumantschs per betg stuair far il necessari. Il zunt nausch exempel actual en quel connex è che vischnancas pon midar la lingua da scola senza che vegnan mess a disposiziun ils meds d'instrucziun necessaris per quel intent. Quest privel na vesan bleras e bleras betg avunda, sajan quai exponents d'ina u da l'autra sparta u er auters cun sa metter cunter il rumantsch grischun che n'è bain betg ina lingua dal cor, mabain dal chau – era sche la situaziun è ussa sa calmada legrai-vlamain.